





c opt





ANTIPROPON;
OV
CONTREPOIDS
AVX IESVITES, ET
aux Ministres de la Réli-
gion Pretenduë Re-
formée.

*Vtinam appendendo appenderetur que-
rela mea, & contritionem meam
in statera eleuarent pariter
Job 6. cap. 2.*

1617.

600-

Case

F

THE NEWBERY
LIBRARY

39

.326

1617mc

ANTIPROPON

OV

CONTREPOIDS

AVX IESVITES, ET AVX
Ministres de la Religion pre-
tendue Reformee.

A La mienne volonté, disoit Iob, que ma plainte fust pesée par l'équité de la balance, & que les hommes luy donnassent le contrepoids. Ceste voix d'un homme patiét, vray miroüier des bonnes mœurs; & sur tout de la constance, est la voix commune de l'Eglise, & de l'Estat, qui s'escrie contre les factieux & perturbateurs du repos public. Ce bon homme Iob apres auoir disputé contre ceux qui le visitoient en sa misere, plustost pour discourir que pour le secourir, se plaignoit d'auoir faute d'un homme qui le reprit, & ses faux amis, qui auoyent la bouche plus ouuerte pour parler, que la main pour le penser, & disoit, il ne se trouue personne qui reprenne l'un & l'autre party, & qui à la façon des Anciens mette sa main droicte sur les nostres. Cest homme de bien, qui a tesmoignage de sa iustice en l'Escripture sainte, desiroit d'estre repris & releué, cognoissant qu'il pouuoit faillir, & chopper en ses discours: aussi sa pa-

tience n'estoit apuyee que sur son humilité, & son humilité partoit de la cognoissance qu'il auoit que tout homme pouuant errer estoit subiect à correction, qu'il doit desirer, & prendre en bonne part, s'il ne veut tesmoigner sa presumption par son impatience.

Le public a veu ces iours passez des liurets qui ont couru, pour attaquer, & deffendre la Religion Catholique, Apostolique, & Romaine, les Autheurs s'excusent de toutes parts, & ne veulent estre repris de personne. Les Ministres de la Religion pretendue Reformee ont agressé les premiers par la plume, & par la presse. Le predicateur Iesuite les à prouoquez, disent ils par la langue & par la chaire. Les Ministres de la Religion pretendue Reformee sur le suiet, ou d'une plainte Apologetique, ou d'une deffence ont dressé vn libelle diffamatoire, & vn sommaire de leur croyance. Le predicateur Iesuite auoit fait vn abregé de leur confession pour la destruire en faisant paroistre ou l'infidelité, ou le peu, ou point de force des passages, qu'ils ont cotté aux marges pour preuues de leurs assertions. Sur quoy on dit que les Ministres ont pensé bienlauer & blanchir leur Morefque Religio s'ils falloient, & noircissoient l'Eglise Romaine: & l'ont representee si hideuse, que si les ames bien affermies en la Foy n'eussent reconnu qu'ellen'auoit rié de laid que l'habit que ses ennemis luy donnoient par leurs paroles menteuses, ils en eussent eu horreur comme d'un monstre espouuentable: bien estonnez de voir celle qu'ils croyent estre espouse de

Iesus-Christ metamorphosée en furie, ennemie des Roys, allumât avec son flambeau les feux de discorde dans leurs Estats, & avec ses serpents entortillant leurs Sceptres, & leurs mains de iustice. Qui seroit celuy d'entre nous qui se voudroit dire fils d'une telle mere s'il ne croyoit fermement, ou que c'est vn phantome forgé dans l'imagination folle & ensemble malicieuse de ces gens là, ou que ces Antiphe-rons, qui ont tousiours deuant les yeux leur Religion pretendue reformee, en la voyant ont creu qu'ils voyoient nostre Eglise.

On dit aussi que le predicateur Iesuite est plus veritable en ses attaques & deffenses, que releué en ses discours, plus hardy, & eloquent en chaire, que disert, & rehaussé en ses escrits, qu'il est modeste aggresseur, & encores plus modeste deffenseur de la cause de toute l'Eglise, de celle de nostre saint Pere le Pape, de tout le corps du Clergé, de sa compagnie & de la sienne particuliere: qu'il ne deuoit pourtant deliurer vn broüillard escrit à la haste, pour soulager sa memoire, & le donner à vn Heretique, deuant presumer que leurs Ministres, qui sont tousiours aux aguets pour decouurir vn suiection de querelle le prendroient pour vn cartel de deffî: que s'il n'eust rien escrit on l'eust estimé plus habile escriuain qu'il n'a paru, & eust ruiné d'auantage ses aduersaires, ausquels il ne falloit point de plus grande confusion, que celle qu'ils s'estoient acquis par les menteries de leur Epistre & impertinentes preuues de leurs articles. Les Ministres de la Religion pretendue Reformee

monstrent (dit-on) quelque espee de courage: lors qu'ils semblent demander vne dispute, & conference publique deuant sa Maiesté, ils disent que les Predicateurs Catholiques en leurs chaires se font tous blancs de leurs espees, & qu'ils feront les leurs toutes rouges de leur honte: mais le prouerbe Italien dit, que entre le dire, & le faire il y a grande distance, ceux qui parlent si bien à l'ombre, & escriuent ce qui se presente à l'esprit dans leur estude, s'estonnent quand ils sont au soleil: ou dans le monde, au liure duquel la plus part n'entendent rien non plus qu'au liure de vie.

On dit aussi que le predicateur Iesuite a fait en chaire des protestations excessiues, iusques à dire qu'il veut estre damné, (qui est en vn mot de se dōner au diable) s'il ne les confond tous par leurs propres textes, & quoy qu'il excède en la façon de protester, & de proposer, si peut il ce qu'il dit avec la grace de Dieu, qu'il n'adiouste pas: mais on croit qu'il l'entend. On dit aussi que les Ministres se soubscriuent Pasteurs de l'Eglise Reformee de Paris sans memoire, au moins efficace des Edicts, & sans congnoissance, que l'Eglise ne peut estre à proprement parler reformee, si elle a perdu toute son essence en perdant la foy. On trouue aussi estrange que le Predicateur Iesuite s'intitule en son propre ceure, & qu'il fait imprimer Reuerend. Cela est dit-on contre les procedures ordinaires, & humilité Chrestienne, & religieuse: outre que reuerend est le tiltre, qu'on donnoit nagueres aux Euesques que les Iesuites leur

ont osté, en les faisant monter au superlatif, pour les deposseder du positif, & baillent à leur General pour distinction *Admodum*, iugez si *admodum* avec vn positif vaut plus, ou moins qu'un superlatif. Les Ministres de la Religion pretendue reformee ont aduancé que les Iesuites se disent compagnons de Iesus, dedaignans de se dire disciples: surquoy on dit que le Predicateur Iesuite pouuoit respôdre, qu'ils ne se sont iamais dits compagnons, mais bien de la compagnie, & que ce mot ne met pas vne esgalité comme l'autre: le simple soldat n'est pas compagnon de son Capitaine, encor que pour l'encourager il l'appelle tel. Les anciens comme Iules Cæsar, & plusieurs autres en leurs harangues militaires les ont appelez compagnôs, pour leur gagner le cœur par ce tiltre d'honneur. Mais on dit que les Ministres de la Religion pretendue Reformee ônt repliqué à quelqu'un, qui les vouloit payer de ceste repartie (que le pere Arnoux n'auoit voulu aduancer, pour quelque respect qu'on ne sçait pas) que si les Iesuites ne veulent dire autre chose par ces paroles de la Compagnie de Iesus que ce qui se dit ordinairement des soldats qui sont sous la conduite d'un Capitaine, ils font tort à tous les Chrestiens, qui sont aussi bien qu'eux par le Baptisme enrollez sous ceste enseigne de Iesus: & tout ainsi que celui qui dresseroit vne religion qu'il nommeroit les Chrestiens, feroit tort à tous ceux qui portent ce nom, ne pouuant prendre, ce tiltre que pour faire paroistre, qu'ils sôt Chrestiens par excellence qui feroit vn orgueil in-

tolerable , & vn meſpris de tous ceux qui ſe diſent , & en eſſect ſont tels par l'onction baptiſmale. On dit qu'ils adiouſtent de plus que les exemples , que les Ieſuites apportent des filles Dieu , & enfans du ſainct Eſprit ne peuuent ſeruir d'argumēt valable pour eux , qui ne voudroiēt pas faiſant eſtat d'eſtre iudicieux & bien aduiſez tirer conſequence du tiltre , qui a eſté donné à vne maiſon particuliere par l'affectiō du peuple ; pour nōmer tout vn corps d'une Religion d'un nom commun à tous les Chreſtiens , ou ſ'il eſt particulier ne pouuant ſignifier que ce que les Miniſtres de la Religion pretēdue Reformee diſent , ou ſauuez , & predeſtinez : ainſi que l'interprete Ludolphe le Chartreux Ieſu : c'eſt à dire ſauué , qui ſeroit tomber en l'erreur des Nouateurs de noſtre ſiecle , qui ſe diſent tous aſſeurez de leur ſalut , mais on dit qu'il ny a pas apparēce qu'ils veulent s'accorder en ce ſeul point avec eux : puis qu'ils ſont eſtat d'eſtre , & ſont en eſſect leurs grands ennemis. Il leur reſte encore vne diſtinction : On dit qu'ils ſe diront eſtre de la Compagnie de Ieſus preſchant , & conuertifiant les pecheurs , & non de Ieſus entant que Sauueur par ſa croix ou chef de l'Egliſe : mais on dit que c'eſt offencer tous les Religieux , qui ont meſme fonction & exercice qu'eux , de faire ceſte diſtinction de Ieſus de la chaire , avec Ieſus de la croix. Le Pape Sixte V. leur oſta ce nō par vne Bulle , & dit à quelque perſōne qui lui eſtoit familiere , qu'il ne uoloit point eſtre ſubiect à oſter ſa barette , & flechir le genouil quand il nommeroit ces Religieux. On dit que

que c'est vne outrecuidace insupportable aux Ministres de la Religion pretendue reformee d'appeller ceux qui suivent leurs erreurs nos peuples, & que celan'appartient qu'aux Rois, & souverains. Aussi, dit-on, font-ils des Roitelets: mais ils ne s'appuyent pas sur les ailes de l'aigle Royale. On dit aussi que les superieurs des Iesuites appellent leurs inferieurs les subiects de la Compagnie: ils sont par consequent Seigneurs; ce qui n'est pas suivre le conseil de S. Pierre qui dit ne faisant pas des Seigneurs parmy le Clergé: ny celui du Fils de Dieu, qui enseignoit à ses disciples, vous sçavez que les Princes des nations les maistrisent, & seigneurient, & ce qui s'ensuit, il n'en sera pas ainsi entre vous. On dit que les Ministres accusent nostre saint pere le Pape de mauuais desseins, & dangereuses pratiques contre les Estats, & vies des Roys, & que le Iesuite ne les deffend pas, croyant (dit-on) estre assez qu'on cognoisse que c'est Geneue qui parle de Rome, & que ceste calomnie est trop esloignée de verité. On sçait bien que ces taches ne furent iamais au saint Siege, & que les mauuaises maximes de ceux qui pour le flatter augmētent sa puissance, & amoindrissent celle des Roys ont esté condamnées par les plus sages de la Cour de Rome, & n'ont iamais esté confirmez par aucun Decret des Conciles, ou declaration des Souuerains Pontifes: qui peut dire avec verité que ces meschants axiomes modernes ayent donné telle atteinte à l'esprit de Paul V. qui gouerne à present saintement, & paisiblement l'Eglise, qu'il aye rien entrepris sur les

droicts de nos Roys, avec lesquels il traite par son Nonce par voye de douce representation & non de droict. Le grād Prestre sera assis sur son throsne, & le Roy sur le sien, & la paix sera entre eux deux (dit Dieu par Zacharie) leurs iurisdctions sont distinctes, aussi bien que leurs couronnes sont diuerfes, & ceux qui les estiment contraires, & les veulent faire entrebatre, veulent allumer le feu de dissension dans la maison de Dieu & des Roys: pour courir au pillage de l'une & de l'autre: & comme les vaultours de Gabrias veulent animer au combat le Lion & l'Ours, pour en manger vn, ou tous les deux. Les Ministres de la Religion pretenduë Reformée disent que les Iesuites par leurs Maximes, distinctions, æquivoques, entendeus, secretes menees & pratiques, tendant à ruiner l'Estat: pour seruir à l'ambition de ses ennemis. On dit que si cela est en quelques particuliers, comme il peut estre, ils ne prennent pas garde, que se glissans tout doucement soubz le ventre de cet Elephant pour le fendre avec le couteau de leur langue, & de leur plume ils seront comme Eleazar accablez par la cheute de ce grand corps, & par les ruines de tout ce qu'il porte sur son dos. Tout ce qu'on peut & doit reprēdre en eux, & de quoy ils ne se peuuent lauer, est que tous leurs Theologiens qui ont escrit, suiuet, & approuuent les mēsmes distinctions dangereuses, & flateuses, & que les Iesuites n'ōt rien respondu, & ne respondront iamais à ce point, leur dernier retranchement ne pouuant auoir icy lieu, que ce sont fautes des particuliers: puis-

que ces liures sont approuuez par le chef de l'ordre, & que l'vniuersel n'est composé que des particuliers qui s'accordent tous en mesme chose selon la regle de Logique. Mais les fautes ne pouuant estre d'autre nature, que fautes des particuliers: puis qu'il n'y a point de vniuersel hors d'iceux, si on ne veut recepuoir les idees phantastiques de Platon. Les Iesuites ne sont ils pas (dit on) plaisants distingeurs lors qu'ils veulent payer les Roys, les Cours souueraines, & tout vn public par le nō de fautes particulieres, lors que leur chef, & tous leurs escriuains Theologiens s'accordent en mesme opinion; sans que la Cour de Parlement de Paris aye iamais sceu obtenir vn desadueu: ie ne dis pas du General, mais du moindre particulier, quoy qu'ils ayent esté condamnez à leur faire paroistre du chef, & des principaux mébres: à qui s'en prendra. on dorresnauants'il arriue du mal de ces meschantes maximes, qu'à tout le corps. Mais on dit que les Iesuites ont souuent en bouche que c'est la Religion pretenduë Reformée, qui ruynel'Estat en se cantonnant dans le Royaume, où elle a quantité de villes, & places dans lesquelles le Roy n'est maistre que selon le bon plaisir de ceux qui les tiennent, qui en bannissent Dieu, & l'authorité du Prince tant qu'ils peuuent. Ceux qui n'appreuuent pas les façons de faire des vns & des autres, disent que Clodius accuse les paillards, Catilina Cethegus, & que la poisle noircit le chauderon. Ceux de la Religion pretenduë Reformée, disent-ils, ouuertement, demembrent le Royaume faisant vn

corps dans l'Estat, qu'ils battent en ruine: que les Iesuites le sapperent tout doucement par menées secretes & maximes dangereuses, que ceux là sont impies destruisants toute religion, que ceux cy l'exaltent & preschent pour en abuser. La naïfue pure, & simple pieté de nos ancestres se maintient & conserue en peu de personnes bien sensées, entre les impietez & ignorances de ceux-la, & la superstition, & trop subtiles distinctions de ceux-cy. Iesus-Christ peut estre crucifié entre deux contraires larrons: le moins malicieux se recognoistra peut estre à la fin. Ceux de la Religion pretendue Reformée ont dit que leur espée a porté le feu Roy de glorieuse memoire à la couronne, & qu'ils conseruent l'Estat contre les desseins des estrangers: ils ne laissent rien aux Catholiques: mais on leur peut respondre que s'ils croient ce qu'ils escriuent, ils sont aussi fols, que celuy qui pensoit que tous les vaisseaux du port de Pyrée estoient à luy, s'ils se persuadent que toute la loüange de ce qui a esté fait pour garentir l'Estat du naufrage, & pour sa conseruation au port de paix leur appartient; On sçait que pour vn des leurs, cent des nostres y ont travaillé, & qu'ils ont manqué de se rendre aux meilleures, & plus vrgentes occasions comme deuant Paris, & Amyens: mais on dit qu'il faut que les vns, & les autres recognoissent que c'est Dieu seul, qui par vne singuliere, & extraordinaire prouidence à calmé nostourmentes, & soubz Henry le grand par plusieurs batailles, sieges, cōbats, & rencontres: & soubz vn fils vrayement digne d'un tel pere, lequel

en c'est aage par vn soufflé a dissipé les plus espais brouillards, qui ayent iamaïs troublé, & obscurcy l'air François. On dit que ceux de la Religion pretenduë Reformée s'attribuent en l'Estat, ce que les Iesuites se donnent en l'Eglise, se persuadants qu'ils la maintiennent eux seuls, comme on dit qu'il se voit par leurs Annales qu'ils impriment tous les ans, remplies de mille badineries, & faucetez; où ils se font auteurs de tout ce qui se fait de bon en la Chrestienté pour la conseruation & augmentation de la Religion: ils les tiennent secretes, parce que le public les dementiroit, qu'on y liroit des secrets, qu'ils ont apprins aux confessions, & qu'elles ne sont ordonnées que pour entretenir la ieunesse, qui est parmy eux en bonne opinion, & admiration de l'institut, fonctions, & succez heureux de leur compagnie. On dit aussi que les Ministres de la Religion pretenduë reformée augmentent ceste croyance que les Iesuites ont, qu'ils font tout ce qui se voit de bon, & de rare en l'Eglise, les attaquant eux seuls comme l'vnique rempart de la foy: mais quand il seroit abbatu, Dieu qui n'a iamaïs manqué de donner secours à son Eglise leur feroit voir beaucoup d'autres fortifications des Prelats sçauants, des Curez, Theologaux, & Chanoines bien instruits, des doctes & bons Religieux, & sur tout le bastion imprenable de ceste venerable faculté de Theologie de Paris, & de plusieurs autres academies qui sont dans ce Royaume, quoy que les Iesuites les couurent vn peu, s'aduançants les premiers, & paroissants les vns apres les au-

tres sur le Theatre de la Cour , & des plus haultes chaires. Peut estre aussi que les Ministres de la Religion pretendue Reformée ont la maladie d'Iâerius, qui voyoit toutes choses iaulnes: c'est à dire qu'il leur semble que tout ce qui s'oppose à eux est Iesuite. Les meilleurs retranchements de l'Eglise sont ceux que ses ennemis ne decouurent pas. Ceux de la Religion pretendue Reformee se plaignent de ce qu'ils sont contrains d'aller seruir Dieu bien loing des villes: eux dit-on, de qui les Peres ont fait ouyr la Sainte Messe aux nostres dans des granges, & des caues apres auoir ruyné ou prophané la plupart de nos Eglises, & qui n'ont iamais permis l'exercice de nostre religion aux lieux, ou ils ont esté maistres iusques à ce que l'autorité Royale les y a portez. Mais on dit qu'ils ont grand tort de se plaindre del'essoignement de leurs temples, pour l'incommodité qu'en reçoient leurs enfans nouveau-nez. Par quelle regle de l'Escriture sainte ceux qui disēt qu'il faut reietter toute Tradition sont obligés de baptizer seulement dans le temple, & apres le presche? qu'ils accusent doncques leur nouvelle & inhumaine maxime, & non le Roy. Ils se plaignent de la difficulté qu'ils ont de faire instruire leurs enfans. Les Iesuites se plaignent aussi de ce qu'ils n'enseignent pas à Paris. Accordez dit-on, ces gens-là, qui veulent tous des Colleges, ceux là veulent remplir la France de Ministreaux, ceux cy de gens, qui apres auoir apprins trois mots de Latin desdaignent le commerce, & les manufactures: ce qui apporte vn grand desordre

dans le Royaume, qui n'a que trop d'estudians,
 & trop peu de sçauants. On s'estonne de leur
 importune instance a vouloir enseigner dans
 Paris & ailleurs, veu qu'eux, qui ne recherchèt
 ces choses que pour plaire à Dieu (comme ils
 disent) sont suffisamment deschargez deuant
 luy : lors que les Cours souueraines & les Cō-
 munautéz ne les desirent pas si ce n'est que par
 ces instances ils veuillent faire paroistre qu'ils
 recherchent leur interest particulier, & qu'ils
 ne prennent la gloire de Dieu, & le bien du
 public que pour seruir de couuerture a leurs
 desseins, & ambition. Les Ministres de la Re-
 ligion pretendue Reformee se plaignent de ce
 qu'on les calomnie, & qu'on diffame leur Egli-
 se : les Iesuites n'ont autre chose en bouche, &
 en leurs escrits. On dit que les vns & les au-
 tres pensent auoir refuté tout ce qu'on dit
 d'eux, quand ils ont crié, ou escrit (calomnie)
 croyants que ce mot peust effacer toutes les
 mauuaises impressions, qu'on a conceu de
 leurs dicts escrits, & faits, cela vient, dit-on, de
 ce que les vns, & les autres estiment leurs vices
 vertus, les couurants de prete tes de religion,
 qui donne chez eux aux maximes, & actions
 les plus dangereuses, le nom d'actions, &
 maximes de saint zeile, & aux reprehensions
 qu'on leur fait, celuy de calomnie. On adiou-
 ste qu'ils deburoient prendre garde que s'ils
 estoient chargez de calomnies Dieu le per-
 mettoit ainsi : pour les punir des leurs & les
 payer de la mesme monnoye qu'ils donnent
 au autre, comme les Ministres de la Reli-
 gion pretendue Reformée de celles, qu'ils im-

posent au Pape le faisant vn aualleur des Roy-
aumes, les Ecclesiastiques sans exception des
perfides à leur Roy, des mespriseurs des Ma-
gistrats, & qui recognoissent vn autre supe-
rieur pour le temporel que leur Prince legiti-
me : calomnies intolerables qui attaquent le
chef, & tout le corps de l'Eglise, & la premiere
partie du trio de l'Estat, & qui sont aussi faul-
ses comme il est vray que les Ministres de l'E-
glise pretendue Reformée sont des serpents
qui s'entortillent au tour de la clef de S. Pierre:
mais on n'estimera pas comme ce sot Areopa-
gite que ce soit vn grand prodige, cognoissant
la nature serpentine des Heretiques, & calom-
niateurs : on croiroit plustost avec cest autre
Athenien, qui estoit bien plus auisé, que ce se-
roit vn monstre si la clef auoit entortillé le ser-
pent, & l'Eglise imploiable aux erreurs auoit
fleschi s'accômodant aux heresies pour seruir
au temps, & aux grands. On dit aussi que les
Iesuites doiuent bien prendre garde qu'en leurs
libelles qu'ils font pour se vëger de ceux qu'ils
croient estre leurs ennemis, ou qui s'opposent
à leurs desseins, qui ne veulent point rencon-
trer d'obstacle, & rien qui ne face ioug à leur
establissement, ils n'escument par fois comme
vn torrent, qui rencontre vne ecluse qui luy
arreste & destourne son cours, & qu'ils ne cra-
chent, & couchent sur le papier des iniures in-
dignes de la bouche, & de la plume, ie ne diray
pas d'un Religieux & d'un Chrestien : mais d'un
Payen moralement sage : comme on dit que
la Royne mere importunee de tels discours, il
n'y a pas long temps, dit d'un de leur Societé

parlant à deux notables Officiers du Roy.
 Les Ministres de la Religion pretenduë
 Reformée disent qu'ils enseignent à mourir en
 paix: on dit qu'il est vray; puis que l'assurance
 qu'ils disent auoir de leur salut, les exempté de
 la crainte de l'Enfer, & leur croyāce de la peur
 du Purgatoire: mais on remarque que Caluin
 a tort de leur reduire le Paradis à vn certain
 porche, où les ames sont arrestées iusques au
 iour du iugement, attendant qu'on ouure la
 porte. On dit aussi que les Iesuites doiuent
 prendre garde à ce qu'on dit d'eux, & qu'on
 peut facilement colliger de leur pratique, que
 les plus grands pecheurs, vsuriers, trompeurs,
 paillards, & femmes desbauchées, peuuent
 mourir en paix, quoy qu'ils cōtinuent en leurs
 vices: mais qu'ils donnent quelque chose à leur
 compagnie pour satisfaction de leurs fautes, se
 faisans restituer ce qui a esté prins à autres qu'à
 eux: ils adioustent que c'est vne grand' marque
 qu'on est du nombre des Esleus de les aymers,
 & pour la paix & tranquillité de conscience de
 ceux qui se confessent à eux: on dit, & on peut
 tirer des escrits de leurs Casuistes, qu'ils ont
 trouué des distinctions pour commettre sans
 charge de conscience les sept pechez mortels:
 le tout *ad maiorem Dei gloriam*, à laquelle ils rap-
 portent toutes choses *directe* ou *indirecte*, *per se*
 ou *per accidens*. On dit aussi que les Ministres de
 la religion pretenduë reformée, ont grand tort
 de dire, qu'ils mettent au rang des Martyrs &
 Saints de leur Ordre ceux qui ont entrepris
 sur la vie des Roys: car ils ne sçauroient veri-
 fier que iamais Iesuite en personne aye cōmis
 le crime detestable. On sçait bien que Garnet

fut accusé en Angleterre d'estre participant de la cōspiration de ceux qui vouloient faire saulter par la fougade le Roy de la grande Bretagne, & les Milors, & qu'il fut defait sur quelque indice qu'on eut, qu'il estoit complice: on ne voudroit pas asseurer qu'il aye esté clairement cōvaincu, mais bien qu'il ne faut pas sur ce doute le mettre (comme on dit qu'ils ont fait) au rāg des Martyrs, qui est pour ceux, qui ont esté tuez en haine de la religion seulement sans meflange de crime contre l'Estat, & la vie d'un Roy. On dit que les Iesuites ont fait des contes merueilleux sur la mort de ce Garnet, & qu'ils ont fait grauer vn certain espic miraculeux, sur lequel vne goutte du sang de ce pere auoit exprimé son portraict, & la teste d'un Cherubin qui l'emportoit avec les dents: chose qui fut trouuée si ridicule (n'estant d'ailleurs appuyée que sur le rapport d'une femme) qu'un de leurs peres s'en trouua bien en peine, mesme aux terres du Pape, ayant esté mis à l'Inquisition: pour auoir fait grauer & distribuer les coppies de cest aspic, selon l'exēplaire enuoyé de Flaudres, où la fable auoit esté forgée, & ils font à croire icy, qu'ils gouuernēt tout en Italie, où l'on dit qu'ils sont tenus bien plus bas qu'en France, & n'oseroient auoir entrepris la moitié de ce qu'ils font icy: parce que les femmelettes n'ont pas tant de credit en ce païs là, ny eux le moyen de les pateliner si familièrement comme ils font à Paris: outre que les Papes tiennent qu'il les faut abbaissier pour les conseruer: mais il ne faut pas oublier qu'en ces quartiers là Guignard est entre leurs Martyrs, ce saint n'est pas encore de ceux que les pattes

peluës celebrent deça les môts. Ainsi nos Rois
 aurôit esté des persecuteurs, & fait des Martyrs
 & selon les Iesuites, & selon les Ministres de la
 religion pretenduë reformée, qui disent qu'ils
 les ont persecutez: mais n'en desplaie aux vns
 & aux autres, ceste tache n'est point en nos
 Rois, & ne se lira pas dans les Martyrologes
 qu'ils ayent fait mourir personne en haine de
 la vraye Religion, si ce n'est que selon le sens
 de ces Messieurs on vueille prendre des crimi-
 nels semblables à ces descrits, & descriez par
 Eunapius pour des Martyrs, & des crimes con-
 tre l'Estat & personnes des Rois, pour deffen-
 ses de la Religion. Les Ministres de la religion
 pretenduë reformée se seruent, dit-on, d'equi-
 uoques & de distinctions aussi bien que les Ie-
 suites, lors qu'ils disent, que nous leurs impo-
 sons d'estre ennemis de la bië-heureuse Vierge
 & des Saints, qu'ils tiennent que les bonnes
 œuures ne sont pas necessaires à salut, & qu'ils
 font Dieu autheur du peché, protestans que
 toutes ces choses sont esloignées de leur croyā-
 ce: en vn sens on dit que cela peut estre vray, &
 en l'autre non, & qu'il ne faut pas s'asseurer sur
 ce qu'ils en ont dit: il y a de l'entendeux & du
 distingo caché, & s'estudient de paroistre aussi
 bons maistres en ce mestier là que les Iesuites.
 Ils se plaignent aussi de ce que les Iesuites ont
 l'aureille du Roy, & la direction de sa cōscien-
 ce, ils en entrent en ombrage: le Pere Arnoux
 la bien recogneu, & a reparty que leur escrit ne
 rendoit qu'à les rēdre odieux, & à les esloigner
 du Louure, on dit qu'il a deuiné: mais que les
 Ministres de la religion pretenduë reformée
 ont esté peu rusez de l'auoir entrepris, & d'en

auoir tefmoigné leur creue-cœur, ayās pluſtoſt
 trouué le vray moyen de maintenir plus long
 temps ceſt hōme, qui ſe fuſt bien toſt deſtruit
 de ſoy meſme; n'eſtant pas ſi facile maintenant
 de l'eſloigner pour ne donner ſubieſt aux Ca-
 tholiques infirmes, qui ſont du party des Ie-
 ſuites de chanter par tout qu'on luy auroit cō-
 mandé la retraite trop toſt apres celle du Pere
 Cotton, pour obeïr à la paſſion des heretiques
 & en haine de la religion. Quelque finet a dit
 que le Pere Arnoux auoit ſceu par ceſte atta-
 que s'eſtablir aupres du Roy. On dit que c'eſt
 vne autre queſtion ſ'il eſt expediēt qu'un hom-
 me qui par ſa profeſſion a intelligēce avec tous
 les eſtrangers, Italiens, Eſpagnols, Allemands,
 Flamands, amis, ou ennemis de la France, & ſur
 tout avec vn General, non Eſpagnol de nation
 (au moins aſteure) mais peut eſtre d'affection,
 & qui eſt le plus abſolu ſuperieur de tous les
 ordres Religieux, auquel il eſt obligé d'eſcrire
 ſouuent & l'informer de toutes choſes pour
 n'eſtre point eſtimé traïſtre au bien de l'Egliſe,
 & de la compagnie (ainſi dit-on qu'ils parlent)
 doit eſtre aupres du Roy, non ſeulement, pour
 apprendre les ſecrets de ſa conſcience par la
 confeſſion, mais par la hantiſe frequente avec
 les grands du Royaume, & principalement
 avec les femmes: ſçauoir tout ce qui ſe paſſe
 aux affaires, & au conſeil ſecret: ou ſ'il ſeroit
 pl⁹ à propos que ce fuſt vn bon Docteur ſecu-
 lier, qui n'eũt autre correfpondance que celle
 de ſa Sorbōne, ou de quelque College ou mai-
 ſon particuliere dans Paris, hōme ſçauāt, ſim-
 ple, & affectionné au ſeruice du Roy, ſans eſtre
 eſtroittemēt attaché a aucune cōmunauté, à la

quelle il faut seruir plus qu'à foy meſme, & quand on ſeroit de bõ naturel on ne peut viure en paix, ſans trahir ſa cõſcience, pour l'aduancement du bien de tout le corps, qui le porte à flater pour le maintenir & aggrãdir: enquoy vn pauvre Religieux eſt digne de cõpaſſion, lequel ayãt tout quitté, a retenu la flaterie & paterlinerie: cõme cet ancien Philoſophe auquel le baſtelier refuſa l'entrée de ſa nacelle, parce que, diſoit-il, portãt ſouz ſon pauvre mâteau le peſant faix de la flaterie, qui luy eſtoit reſté apres auoir tout meſpriſé, il euſt mis la barquerole & tous ceux qui eſtoient dedãs en danger de perdre, par le poids inſupportable de ce vice, qui perd biẽ ſouuẽt les fortes maiſons des Rois, & les Eſtats tous entiers: pourquoy dõcques ſe fert-on de ces gens-là? On dit que pour obeyr aux foibles eſprits, il faut ſe ſeruir de quelqu'un qui aye intelligẽce à Rome, de peur qu'õ ne ſemble meſpriſer ſa foy, ſi on ne préd vn hõme qui faſſe meſtier d'y eſcrire ſouuẽt. Mais on trouue eſtrãge que le Pere Arnoux aye eſcrit que les Miniſtres de la Religion pretenduẽ reformee ont voulu donner vne atteinte à la Religiõ du Roy, & ils ont tort d'en auoir fait le ſemblãt, les vns & les aures deuroient craindre de dõner ombrage à quelque ame folle & imbecile, de ſe forger des Chimeres & de baſtir ſur icelles quelque mauuais deſſein. Pourquoy donc ne reprime-on les Miniſtres de la Religion pretẽduẽ reformee? On dir parce qu'õ craint ceſte hydre à pluſieurs teſtes, cõme la Sophiſtique deſcrite par Platon. Ils ſont dõc venus à bout de leur deſſein, car ayans recognus qu'ils ne ſe pouuoient faire aimer en bien-faiſant; ils ont voulu ſe faire craindre en ſe cantonnant: ils ſont, dit-on, dãgereux, & ne faut pas eſmouuoir cẽs mauuaiſes humeurs; ils ſeront peut eſtre guaris de ceſte melancolie noire par le tẽps, & par le repos. On dit que les

Iesuites ont plus aduancé: car il leur faut faire du bié de peur de les fascher, & tont plus redoutez par leurs maximès & croyance que les ames trop faciles y adioustent, qu'aymez pour le seruice qu'ils rendent au public. Les vns & les autres ont ce qu'ils ont desiré, qui est de se faire craindre aux Grands, ne se pouuâts faire aymer. Ainsi nostre Tres-Chrestie, tres-sage, & tres-magnanime Roy, qui estoit n'agueres entre la pierre & l'Anche, cōme dit le Prouerbe, est encores entre le marteau & l'enclume: Ainsi ceux que, les Edicts de Ianuier, & du reſtabliffemēt ont estably dās le Royaume, pour en tirer du seruice, n'y sont retenus que par la crainte des armes de ceux de là, & des langues & plumes de ceux-cy, lesquels avec vn *distingo*, & promesse de Paradis font en vn moment & sans fraiz ce que tous les thresors du monde, & toutes les armées del'Europe ne ſcauroient gagner, n'estant plus de beſoin qu'ils excitēt les foibles, folles, & meschantes volontez, puis que leurs liures ont trouuē le *medius terminus*, duquel vn esprit enragē tirera de ſoy meſme vn malin argument, vne plus furieufe conſequence, & vne execution tres-execrable, les Arrests des Parlements qu'ils tiennent pour iuges incōpetens de ces choses & schismatiques (ainſi parlent-ils) n'estants d'ailleurs aſſez forts pour les reprimer ny les ſupplices extraordinaires de les tenir en bride, s'ils croyēt que c'eſt ſauuer ſon ame, obeir à Dieu, & ſeruir ſon Eglise. O ſiecle quel mōſtres as tu à ta porte!

Qu'eſt ce donc qu'il faut cōclure, ſi ce n'eſt qu'une ame bié faite doit tenir la balāce droiſte, & auoir en l'esprit le double *Antirropon*: ou pour ne pācher ſelō le cōſeil du Sage, n'y à la droite ny à la gauche, croire que ceux de la Religiō pretēduē reformée ſont grandemēt iniurieux à Dieu, preiudiciables à l'Eſtat, & à

la tranquillité publique, & qu'ils ne s'ont pas d'autre nature que tous ces Anciens, lesquels ne pouués maistriser l'Eglise par la doctrine, se s'ont establis par le fer, & maintenus par la crainte, leur *Antirropon* sera que se souuenants de leurs fautes passées ils se tiennent dans la modestie sans elcrire, & demander rien mal à propos, & qu'ils recognoissent la bonté de nos Rois, qui leur ont donné plus qu'il ne meritoient, & qui les ont laissés iusques à present iouyr de la faueur de leurs Edits, villes & priuileges, qu'ils leur peuuent oster s'il en donnent le moindre suiet. On dit aussi que les Iesuites doiuent prendre de ceste drogue d'*Antirropon*, pour ne s'esleuer point tant que de vouloir estre l'huile entre les liqueurs, corriger leurs maximes & secretes ambitions, leurs escrits mesdisans, leurs pratiques occultes, & s'humilier, s'il leur est possible, sur la consideration de leurs indiscretions & fautes passées, lesquelles ils n'ont iamais voulu recognoistre, remplissans les oreilles d'excuses, & les bibliothèques d'Apologies & defences inutiles, sans respondre à ce qui les pince au vif, & ne se desdisans iamais, quoy qu'ils ayent auancé, mais equiuoquans tousiours, & fuyans de dire quelque chose d'arresté & asseuré. On dit que les vns & les autres sont d'as cet Estat ainsi que l'humide & le chaud dedans vn corps, qui se mangent, rongent & abbatent l'un l'autre. L'excez de l'une de ces qualitez est dangereux, elles peuuent causer diuerses maladies, quoy que contraires, ce que nous craignons, voyans qu'elles se souleuent extraordinairement en ces iours caniculiers. Les Iesuites nous defendent des heretiques, mais ils secourent les estrangers: les heretiques nous defendent des estrangers: mais ils secondent les desseins des mescontens du Royaume. Voila deux mauuaises extremitez qui contrepesent & tendent par fins diuerses à la ruine de l'Eglise & de l'Estat: n'adherer pas à toutes les opinions des Iesuites n'est

pas estre heretique, comme ils disent; & s'opposer aux
volontez & croyâces des heretiques n'est pas estre Ie-
suite, comme ils croient: c'est suiure la regle de la reli-
gion Cathol. Apostol. & Romaine, & quant & quant
estre bon François, de sçauoir peser l'esprit des vns &
des autres par l'*Antirropon*. Et pleust à Dieu que tous
les Ministres de la religion pretendüe reformée fussent
en Canada, & tous les Iesuites à la Chine, la France se-
roit heureuse, & se verroit reduite à son ancienne sim-
plicité, bonté & obeïssance inuiolable à l'Eglise, à ses
legitimes Pasteurs, & à son Roy tres-Catholique, &
tres-pieux, en estant destournée par deux moyens, &
par deux sortes de personnes contraires: il n'y a que ce-
ste differéce, que les Iesuites s'ils se vouloient remettre
à leur premier institut, & reserrer dans leur coquille,
seroient des perles d'union à l'Eglise & au public, leurs
exercices estans propres pour faire des grands biens
estans bien maniez, comme au contraire ils feront des
grands maux, s'ils continuent d'abuser du credit, que
leurs fonctions leurs acquierent parmy les hommes.
On dit que rien de bon ne peut sortir des Ministres, &
qu'ils font vne belle cōfession, lors qu'ils disent à Dieu
en leurs prieres, Seigneur nous confessons sans feintise
que nous sommes enclins à mal faire & inutiles à tout
bien. C'est l'*Antirropon*, ou contrepoids, que les gens
de bien qui suiuent le bon-heur du milieu doiuent pren-
dre, & s'en seruir de preseruatif contré les maximes &
actions des vns & des autres, craindre tous les iours,
que leurs violences & desseins, qui ne se peuuent arre-
ster, ne nous iettent dans quelque grand mal-heur, &
en fin deplorér la misere de la France, qui est comme
vn eschequier sur lequel le Roc, & le fol visent à mat-
ter le Roy par contraires demarches.

F I N.



